

梅亭先生四六標準

七



四  
六  
標  
準



梅亭先生四六標準卷之十八

寺監

賀黃安撫除大理少卿

知榮州作

晉卿叢棘升帥前茅乘八月之槎既瞻相於斗柄  
星之部仍典領於參旗四履歡然重臨幸甚  
其官負材明允蓄德碩膚濟法澄深得龍津  
炳靈之秀扶輿鬱積繼龜山正學之傳夕留金馬  
之坊妙斡木牛之運中兼閩制外憺戎昭遠略折  
衝南人不復反矣從臣虛位東山以公歸兮然河  
內競借於寇恂宜關中復留於蕭相峻并金掌併

總玉鈐公去公來信有關於輕重時行時止俱不  
失其光明共羨班景倩登仙之除咸有樂正子為  
卿之喜佇盡護於諸將遂進長於六官其凄其一  
寒去此十暑未問五馬二毛之無用最覺孤鴻獨  
影之可憐矧熬波之素封今掃地而赤立水旱重  
蓼蟲之苦風景增葦鱸之思所幸穎川黃霸之復  
來或察夜郎李白之可念老牛舐犢誰敢論瓜葛  
之連孤鳳求凰或亦備蘋蘩之薦其為頌後罔既  
鋪茶

賀岳總領 珂除大卿



四牡奏最九苞升班王人不微風序諸侯之上臣  
卿雖少有光八使之間邊面驩然帝心簡在恭惟  
某官天材敏邵地望穹華滿腹精神解千牛之肯  
綮撐腸文字空萬馬之躊躇豈惟建武功臣之家  
亦習正元供奉之曲久將餉指仍領价藩盍歸乎  
來遂登龍尾見知則悅聊進豹祛卿不同乎暫掌  
九功之貳侯誰在矣亟膺一札之招某共飲玻璃  
未覲珪玕視諸故府龍豬竊幸於同宮于彼新田  
燕雀敢稽於賀夏

代回王大卿補之

入覲楓宸升御棘寺民之收旣又凝畫戟之清香  
王曰遄歸復畀青氈之舊物恭惟某官器質庸敏  
機量浚明京兆有王之歌至今未泯江東無卿之  
嘆所去見思輟自銀符入躋金掌敬爾攸獄監于  
祥刑民自以不寃行課清明之效王言惟作命即  
登獻納之班某過沐幸臨更勤委重冷秋菰寒水  
玉覺執執之頓清金錯刀英瓊瑤愧報嘉之不腆

代回李寺正

直柄

拜命楓宸陞華棘正好生如舜方惟刑之恤哉選  
衆舉臯則不仁者遠矣恭惟某官持心近厚折獄

惟良自再轉而爲丞益揚淑問宜片言之寤主茂  
進崇階某有幸爲寮未皇稱慶猥辱鳴謙之賜聊  
申叙復之私

代回劉寺正

刑期無刑丞非余負正率不正帝曰汝諧先庚具  
孚同寅良幸某謬忝秋官之貳極深夏賀之私姑  
奉手綫別違面慶

代回李寺丞

直柄

拜命明庭司刑贊府一麾出守所至如破竹然再  
轉爲丞此行若登仙矣恭惟某官機神明浚識度

端凝治已治人洞知周孔之情思讀書讀律又欲  
堯舜其君民徧儀棘寺之華幾致草扉之鞠郡符  
旣合邊瑣多驚甫清遠障之風塵旋奉殊庭之香  
火帝念師旅飢饉之後折民惟刑人思賢明慈惠  
之師命汝作士肆敷芝檢參貳李官昔張蘊古之  
直聲由茲論賞雖狄梁公之相業自此升階欲識  
遠圖請觀近比某與聞犴獄似是馬曹具嚴天威  
望盡心於閱實頗哀老子或袖手以蒙成少違九  
遷當不一賀

代回陳寺丞

振

方欲取違先勤言別出處亦吾輩之先事是非至  
他日而後明風雨蕭蕭願雞鳴之不爽雪霜曾曾  
終麥秀以何疑敢因報章并申善禱

代回呂寺丞

祖平

奏最竹符陞華棘寺辟以止辟九重之念在茲丞  
不負丞三尺之平必矣恭惟某官象賢濟美燕譽  
騰芳伯仲填箎曲突之忠甚切公侯閥閱一鈎之  
釣猶遲茲從漢化之更宜有呂刑之命某辱同寮  
竊喜倍等倫自此家成不負嘉師之託逃於司敗  
亦惟餘潤之依

代回大理沈寺丞

繹

父參棘屬進貳李官丞不負丞益懋平反之蹟辟  
以止辟助成欽卹之仁某有幸為寮未遑趨慶

代回沈評事

榮持邑最歸領廷評惟丹筆之祥刑實青檀之舊  
物頭銜如故步武已高恭惟某官服龍芳馨蜚騰  
聲實早脫囊中之穎詳明柱後之文棘寺參華竹  
書惟允屬拘邦典暫試民庸麥熟兩岐雖道途之  
交詠桃栽千樹宜車馬之重來某有幸為寮未遑  
贊慶遣長鬚而致雙鯉良感先施跂織女而終七



襄更斬匪報

代回大理樓評事

澄

舉賢有格當簡乃僚折獄惟良徒得君重公車之  
牘晚矣私室之謝何哉恭惟某官地望已高天資  
仍茂讀書不讀律懼無術以致君治已後治人寧  
以身而試法決科雋甚詳讞瞭然豈無他人恐未  
如於一鶚惠而好我何不吝於雙魚某濫貳秋卿  
又見春序小孤汜濟亦奚事於聽冰良馬空羣望  
自期於追電

代回程監丞

準

五雉分工誤恩攝長雙魚尺素取數過情恭惟某  
官四海老成累朝著舊人生待足何時足得  
佳官職有來還自來不聞亦式應笑戀軒之疲馬  
未能返肆於屠羊某自揣頭顱難司喉舌上朝伊  
夕即騰納祿之章爲官擇人空忍見賢之渴

代回程監丞

準

出命明庭祝釐間館雋永乎山林之味樂且無央  
參寥乎香火之緣老當益壯恭惟某官棲遲盛福  
笑傲明時詔祿珍臺又拜散人之號養神丹鼎應  
與造化者游所恐蒲迎不容橘隱某歸已晚矣行

或使之汗漫相期本許以急流之勇退侏儒獨飽  
敢久於暮夜而倒行

代回軍器王監簿

渥

對越宸綸勾稽武庫爲太守選所表既有交章除  
戎器戒不虞實爲稱職公議如此私謝何爲恭惟  
某官故家典刑中州宵出婉贊幕中之畫勇分海  
上之符焉能使予不遇哉姑從外補有欲爲王留  
行者迄得內除時雖旣戢於干戈法合咸精於器  
械小煩會計會即騫騰某自嘆望秋未遑賀夏豈  
無青精飯此心惟切於謀歸贈我綠綺琴無說可  
從而厚報

回朱司令

在

渙奉宸綸晉司帝籍用過庭所學之禮習祈年孔  
夙之詩有渥新除式光舊德恭惟某官清明德望  
名世故家先正接伊洛之宗源流甚正後學出河  
汾之派沾丐居多卒老于行克昌厥後故從綠水  
紅蓮之幕入庀紺轅黛耜之司此非不稼而取禾  
政欲敷苗而肯播少培飛步即輅華塗某偶此綴  
班何勤委贄自憐往日識野鶴於未仙猶喜殘年  
見名駒之有種

代回詹大社又中

陞華司社贊治容臺惟是詩書禮樂之儒始明邊  
豆簞簋之事用人如此通國欣然恭惟某官奮自  
清明徑收名第下惟分教不辭獨冷之擅當路交  
章爭取橫前之寶果從蜀道入典漢祠拜如絲如  
綸如縵之言實自今始考以松以栢以栗之義應  
有古心某有幸識賢過蒙委贄數旬爲客會已見  
於榮遷一日不齋猶願安於承教

代回趙太社汝讜

宬司太社贊治奉常舍文字旁午之勞共夙夜惟  
寅之命恭惟某官九苞威鳳千里名駒抱朱虛之  
忠請鉏呂產笑紅休之陋更媚王音毅然料虎之  
頭樂只跋狼之尾忠精既白論諫如丹徑咨禮樂  
之英入司邊豆之事雖雖肅肅何嫌三百日之齋  
親親賢賢行有十六相之舉某未遑旅賀先辱臨  
存贈綠綺琴愧不辨南金之報植青藜杖滿期校  
東壁之書

學官

代回李國錄誠之

知賢不早聊剡需章委贄相先足鳴謙德不知所  
報藏去爲榮恭惟某官殖學精深摘文鉅麗早飛  
英於學省即中雋於儒科固知几閣之文書難屈  
朝廷之翰墨爲數旬客已光文學掌故之職無幾  
何時果見國子先生之入比者公車之牘豈其私  
室之恩過辱臨存更勤巽謝某無能報國惟有爲  
賢憑豐隆翹飛廉雖寄聲之已晚登聞風歷閭閻  
猶刮日以相期

代回曾國正準

晉司樂正益重儒官盈几閣之文書久勤作主申  
庠序之孝弟茲遂得師恭惟某官賦敵凌雲文成  
翻水排空直上合盛之白玉之堂取勢斜飛亦宜  
在青藜之館茲以文學之掌故入爲國子之先生  
佇德成而教尊必言揚而事舉某過勤投璧愧乏  
報瓊化民成俗由學乎儀圖莫助傳道授業解惑  
也切幸自強

宮教

賀聶宮教

子述

疇庸軍計分教官藩王事我獨賢勞恬然終歲仁  
人誼不謀利展也自今除目一傳滿口交慶恭惟  
某官蓄學有裕拔材不貲人見其五兵之精神孰  
窺其一劍之肝膽長沙射鴨袖不足以回旋柳嶺  
割雞氣益高而磅礴甫通班箭又宰盤根取美最  
以來朝紛交章之至闕諸公之登臺省盡恩吾黜  
此士之落江湖真令人嚮爲州別駕去國期年皇  
帝曰嘻誰會廩人之出丞相言是莫如國士之追  
方當楮幣新舊之交承頗覺中外人情之胥洽公  
能調益民得懋遷茂不績於帝庭進嘉謀於王府  
會計當而已昔專出納之司誦說云乎哉今乃乾  
摸之職於皇列邸肇建明師高帝子孫固有殊人  
之龍種梁王賓客豈徒授簡於兔園必明禮義庶  
耻之原使知君臣父子之實庶淮南知憚汲黯而  
東海亦敬王尊此外功名時來則爲之耳向來學  
問公烏得無情哉某辱知頗深圖報失喜行行驟  
馬孰不知尺五之去天戢戢魚頭詎敢乞斗升而  
活我

梅亭先生四六標準卷之十九

六院

代回史文思

彌忠

率其屬以儆功慙於尸位簡乃僚而剡奏幸甚得賢公義宜然私謝何也恭惟某官早收名第晚步選階鵲鶴在原因固不私詔王之爵祿鴻鴈于野寧當廢治世之羽儀茲聯事之偶同難見善而不舉惟是四六之惠則貽方寸之慙某非曰納交聊復借重子若無言幾失子幸暮取之拔尤君家所有更贈君無歲寒而易葉

代回黃文思

壽

共工率屬獲陪鄉曲之英應格薦賢實致邦家之助是爲公舉何以謝爲恭惟某官早決科名久淹選調學深純而有本氣穩重而不浮久矣卜鄰久李邕之識面偶然結綬勤貢禹之彈冠何愛一鶚之章少效匹雛之力名節皎日富貴浮雲願無志激昂之言庶不孤期待之意某不善爲斷兆足以行偶成一簣之山亦持自賀切玩連編之月却愧所蒙

代回王文思

自適

聯事爲僚見賢當舉同年有子相識已深輒刻積於公車豈收恩於私室恭惟某官世濟其美父教之忠不謂二十年之間未脫六七階之選聊爲破白何必謝青某老矣斷輪味於推轂奏記誓報非所望於高明處事律身願不孤於題品

代回趙文思

師稟

率屬共工已愧薦賢之不武陳篇奏記更勤博我之以文恭惟某官天派甚清人門具美轅駒奏步自是千里之奇方鳩僦功未脫七階之選察其實歷當以名聞某不勝匹雛濫長五雉同官爲僚之義固已盡心爲善最樂之功更期勉力

粟十九

代回彭文思

耕

五雉爲工正甚幸爲僚雙魚有尺書先勤委執恭惟某官崇蘭流馥喬木故家在梓匠輪輿亦足以試有準繩規矩何患無成所恐出入如相避然莫助左右爲先容也某濫茲攝長行矣告休聞弦賞音已認相求之意留渴待飲所望見察以情

代回龔某告院

堪

疇庸外轄服采中朝乃積乃倉乃糧又勤回謁如絲如綸如綺盍賴主張恭惟某官學本家傳美由

世濟京邑翼翼恬於風月之分江漢浮浮裕此丘山之積進掌四司之告出專一札之文諒不俟駕而行必有勿藥之喜某凄其骯髒久此蹢躅已騰二冝去之章足以行矣猶及再相別而去願不幸哉

代回万俟檢院

作

渙奉明綸晉司理甄導入使諫聖上實千載之逢命汝納言堂下無萬里之隔恭惟某官世濟其美德浮于言練詳臺閣之儀服襲廟堂之學積勞于外益閱其中果騰列剡之章入掌四方之牘告嘉謀于后應無不得其言下膏澤於民亦有無窮之聞某未遑燕賀先辱魚牋驅飛廉而寄聲恍已迷於昨夢排閭闔而披腹猶有望於朝陽

代回新監文思院門史從政

彌忠

分職率屬疇若予工同官爲寮徒得君重貽書寵甚陳義曄然恭惟某官氣節雄深詞華炳蔚丹穴五色皆鳴孤竹之聲青雲共登已正三槐之面居然歛板獨此抱關漢相不以兄故私未妨緩步史魚直哉邦有道願接芳塵某爲長於斯懷歸久矣或論道或審曲等是王官非邀譽非納交願成晚器



架閣

代回吳架閣

柔勝

起自珍祠入司故府人登龍斷孰知靜退之風公  
不蠅營宜有登崇之命恭惟某官器資莊裕德履  
淑均讀數萬言信一第之直涵子閱三十載猶屢  
薦而不入官茲回香火之功名來主文書之几閣  
假途數月發軔九衢某有幸協恭先勤遣記匪我  
言毫實漸堂下之斷輪及爾同寮知免袖間之縮  
手

代回薛架閣

君用

恭一

渙奉新綸晉司故籍文書盈於几愛莫助之牒訴  
裝其懷今知免矣恭惟某官河東鸞鶴冀北麒麟  
自中雋於文闈即舒翹於侯泮鷗臬未集豺虎已  
多車麟麟馬蕭蕭君誰與守印纍纍綬若若吾不  
徒行宜哉薦揚有此除寵佇憲章之明習即臺閣  
之飛騰其甚愧濫巾猥勤銜袖居州在宋真足爲  
王所之賢夫子却齊願更觀儒者之效

代回曾架閣

準

奉一扎之新除司兩部之故籍簿書獄訟之事似  
屈長材文學禮義之官豈非妙選未繇旅賀猥辱

損殘恭惟某官琴瑟廉溫琮璜秀潤摩空作賦早  
呼殿陛之臚重席談經久繫堂堦之馬身纔趨於  
幕府名益震于京師朝方虛掌故之負人皆有欲  
炙之色下交章而薦襴上弄印以授堯群無留良  
衆乃退聽今雖刑清而役簡政須網舉而日張凡  
閣文書何厭數旬之客朝廷翰墨會歸三館之英  
其一自識賢數勤委贄引重鼎不程力長恐見笑  
於大方旣識路又疾驅敢願益堅於壯履

代回黃架閣

伯齋

渙奉新綸晉司故府俎且軍旅之事允藉通材文  
學禮義之官宜爲妙選恭惟某官蟠書拄腹取第  
摘髭祭竈一同有珞珞球球之氣隨輶萬里無  
刺刺之情流聲實於朝廷主文書於几閣更培  
風力會決雲衢某何與推賢過勤委翰投我木李  
莫輸論報之情期君蟠桃姑寫願忠之意

梅亭先生四六標準卷之二十

制帥

賀桂侍郎

如淵

再任制帥

知榮州作

進直奎文借留并絡惟益部刺史之寄在漢已嚴而瀛洲學士之官至唐尤重備茲異數允在真儒恭惟某官器博以周材洪而毅文武式萬邦之憲精神折千里之衝江漢經營卓追蹤於羊杜日月獻納旋接武於夔龍帝念岷峨地連關陝四松候對中權足壯於前茅尺筆策勳數節可窺於破竹爰進真學士之職式重大元帥之威河內共借於

寇君襜帷暫駐關中既留於蕭相營壘益堅光增東壁之圖書權重北門之管鑰式逆衮繡歸耀旂常某乘障雪邊庇身宇下愧涸魚之喁唵隨賀燕以差池牽牛而奪之牛誰能回幕中之辯御馬而窮其馬度決非門下之心僕或愛尺寸之膚更幸貸斗升之水我有二天之飲酒誰敢望於私恩爾來三月之無鹽更乞參於公議其爲頌望曷既數陳賀黃安撫大卿除工部侍郎仍兼安撫制置副使

澳冊元戎升卿起部修車馬備器械夙重小司空

之權閱禮樂崇詩書將正大行臺之任命申重巽  
驩溢全坤恭惟某官智勇且仁直方而大肝膽鍾  
一雙之劍精神峻百丈之峯叔度萬頃之波世莫  
得而澄撓次公重臨之政人轉服其寬明坐令火  
井之沈熒真覺雪山之增重敬刑而成三德既平  
夏辟之三千事典以治萬民爰長冬官之六十藉  
五雉五工之正挽一龜一琴之留當益州疲敝之  
秋湏朔方精明之令星辰聽履豈但高法從之班  
日月爲常佇滿載元功之籍某承流支郡席庇和  
門誰其采白露之段願使轉青天之粟不能者止  
未容叱馭而驅之克壯其猶尚倚約軹之率只

賀聶侍郎

子述

除制置

代董侍郎

躋班禹閣宅牧蜀都輟言語侍從之臣盡護諸將  
藉文武威風之帥式遏四夷渙號風行坤垠雷動  
恭惟某官氣噓海岱胸湛冰霜善刀遊肯綮之間  
全牛立解意匠淡經營之表凡馬坐空惟其日千  
里而有餘是以歲九遷而無慊鸞臺鳳閣積彌縫  
輔贊之功螭陛雞翹弘獻納論思之益上矜遠服  
中遣近臣弄印無以易堯爰峻西清之職披圖指  
以示禹俾圖北伐之功惟真學士象十二月之班

而大府帥總六十州之重獫狁匪茹湏方叔之壯  
猷皇帝曰嘻命崇文而奉詔不但洗岷峨之愴又  
將蕩秦隴之妖玉壘既安金甌必啓某五年承乏  
百伎已窮賴公爲父老而來許我託子孫之契田  
間索粟看即騰新尹之誇門外種瓜便可遂故疾  
之隱

賀聶侍郎交割

代童侍郎

洎選剛辰恢張制閩千二百里之邊面威令風行  
六十餘郡之人心驩呼雷動恭惟某官秀姿玉峙  
炯識冰明鞭霆駕風既出漢廷臣之右捫參歷井  
肯爲蜀父老而來行宣暢於皇靈即蕩搖於戎索  
佛狸之死如有數何待來年晉公之雄甲成功應  
在今日氣色一新於壁壘勲勞滿載於旂常某聳  
聞建牙遂可納履催飛將而追騎虜正虞或累於  
躍歸鞍而飛賀書猶異亟詣於邂逅

賀聶制置

子述

庭揚成渙闡制全坤壁府奎圖莫重東頭之學士  
參旂并鉞况專西道之行營夷虜膽寒士民心愜  
恭惟某官天資弘毅風采浚明精神五兵六丁莫  
擬其銳肝膽一劍百壬爭避其鋒策勲自馴雉而

來取官有驅羊之易今之從政容有位隆而道污  
公所過人正惟功大而心小茲煩雍橐來牧蜀都  
許以金城之便宜盡護玉關之疆場三分籌策小  
試渭濱耕戰之謀百二山河行復關中帝王之業  
功名留於久遠富貴乃其緒餘某夙累公知何辭  
吏役然受敢不敬蚤夜之祝愧乏寸長况讀忍著  
主衣裳之詩義難再適况妻病不離於牀箒而男  
寒久澁於詩書固知公爾以忘私然亦愛之而莫  
助某榆枋尺鷁但願通道遙之遊渤澥雙鳧亦不  
計多少之數

賀丁制置交割

紫殿陞班建碧幢而制閩綠綈趣駕滌紅籬以開  
藩四履重臨萬井改觀恭惟某官材弘以毅德直  
而方所學一本於孔周有言皆合於稷契一堂偃  
月勢炙手以絕倫四海倚冰公掉頭而不往四國  
于蕃之已久九卿當相以何疑頤自桂林復尋印  
竹清獻之琴再鼓當阜民財乖崖之劍重磨足新  
軍律中權有資於後勁外攘全賴於內修暫分治  
於四封即盡護於諸將先聲誕播和氣交騰雪嶺  
之白界天公來則重騎火之紅照夜王曰遄歸某

乘傳無堪代庖非據崇詩書閱禮樂忻逢元帥之  
鼎來封府庫籍吏民敬待將軍而解去

通董制置

居誼

十乘啓行既孤剡牘三年過隙又玷招羅曾微曉  
暢之才可荅頻煩之顧疾驅行李往役前茅伏念  
某學餒而材蕪氣凋而力腐少年妄意頗懷竹帛  
之功名半世拙謀未了布韋之事業強爲祿仕直  
坐飢驅諸公貴人間欲出其門下古來此物自當  
弃之道旁獨銜國士之知積愧文人之厚因同邑  
而薦嚴助自古有之未下車而辟慈明此恩異甚

集二

窮人命薄中道憂歸勞心博博鑽火頓驚於三蟄  
達官衮衮刺天難附於羣飛止或尼之會且歸矣  
駭置郵之有命仍尊選以見招惟兩喜多溢美之  
言故再鼓回愈淡之聽奏函朝徹俞旨夕頒荀文  
若之不進不休今寧愧古閔仲叔之且喜且懼寵  
實若驚茲蓋伏遇某官以社稷臣爲詩書帥留泰  
階台符之步撫坤垠井絡之民去來關雪山之重  
輕出入係蜀道之難易公鎮踰歲月共期裴相之  
來歸小隊出郊垆復喜嚴公之再駐羣彥固多於  
集幙匹夫猶耻於納溝龜放長江使認重來之路

燕尋故壘復窺新捲之簾豈但顯不遺故舊之仁  
亦足占雜進巧拙之量某敢不循其頂踵銘在肺  
肝謹無負有志斯世之將仍每守圖利大夫之戒  
忽騎將軍馬難希處士之壯懷真釣錦江魚敢學  
拾遺之懶性

通制帥安大資

丙

代董制帥作

筆橐贅負濫竊郡符之寵鞞刀執禮行依制閫之  
尊瞻中權勁後之威修小侯事大之敬輒裁柔犢  
仰溷高牙恭惟某官直大以方清和而任凜然忠  
貫於日月巍乎義薄於雲天左袒以呼作熊羆不

十一

二之士左顧而跼收麒麟第一之功皇咨耆耇定之  
勲冊命保釐之寄盡護諸將外撫四夷料天驕之  
必亡諒風寒之宜護蕭何全關中以鎮撫西顧何  
憂周公有天下之勲勞東歸孔邇行由節斧徑秉  
鈞樞立非常之功待非常之人剩光竹帛建無窮  
之基有無窮之聞滿載旂常某承學無竒立朝何  
補二螭載筆初無紀述之長五雉貳鄉非有論思  
之益謬蒙一札假守三刀不辭捫歷之艱但切震  
凌之懼欲具宣於上意正有託於下風望太白橫  
岷峨惟切高山之仰止詣大府受約束更希陰雨



而膏之

代回成都黃待制疇若

輟賢禁甬作鎮少城周家地官方賴小司徒之貳  
益州天府遽勤大元帥之行戾止高牙屹然方面  
恭惟某官靖恭而肅括膚敏而疏通生寶劍之故  
墟地靈人傑接金華之宗派玉潔日光自策名躔  
徧儀要路厭承明勞侍從久陪上雍之祠望太白  
橫峨眉爰馳諭蜀之檄擁元戎之小隊布方國之  
細書火井沉熒雪山增重考西鄰之近比歸秉左  
鈞况東極之深知可操右契某老不得謝命作納  
言慕幾兩幾駟之榮會且歸矣望一琴一龜之出  
行或使之

標二十一

代回成都吳制置獮

裁一箋而起敬未宣摧謝之私疊累幅以鳴謙仍  
拜駢章之寵施輕報重虛往實來佩故舊之高情  
發衰遲之深愧恭惟某官知推人傑學覺天民屹  
偉績於控荆蔚奇勳於諭蜀凜然趙清獻之氣節  
行以張忠定之規模撫五十四州之軍民瘡痍帖  
泰壯一百八盤之門戶氣色晶明雪山之重旣多  
沙堤之築非遠某不堪視蔭後此綴班無以公歸

或一見而後去豈惟我賀亦衆目之具瞻

代回李制帥

大東

疇庸帥閩升鎮制垣犀甲熊旂名在江淮之草木  
麟符魚鑰光通河洛之圖書甚愜師言可爲國賀  
恭惟某官材由世濟學與古稽自其不卑於小官  
人知將降之大任故國非喬木之謂夙盤仙李之  
根今人莫棠棣之如皆近宮槐之影雅聞偉望尤  
抱長材游分半虎之符妙落全牛之刃風寒數虜  
人物渺然固封守以畫郊圻徒得君重訖外庸而  
丞輔無以公歸某濫守洪都密依廣廈落霞秋水

漸欲尋吳會之舟暮日春天安得對江東之酒

代董侍郎回京湖趙制置

方

分閫罔功濫叨璽召循墻俟命敢辱賀緘願蒙一  
介之專遠畀雙鱗之重卷還有醜冒受何居恭惟  
某官以社稷臣爲詩書帥細糴廣廈應接武於夔  
龍緩帶輕裘即近蹤於羊杜一賢制勝萬里折衝  
天子遣趙將軍真得破羌之策路人問霍去病行  
收絕漠之勲功名剩跨於數公同書竹帛步武徑  
躋於兩社歸勒鼎勳某守蜀非才擒胡不力以此  
衆戰無可奏之膚公不自意全亦粗殲於羣醜尚

欲決焚舟之戰乃不容俟駕而行已貢天牋願省  
術於田里尚依雲霓得佚老於林泉

回趙副帥

彥呐

守偏城而惕日無以瘡人使一道以觀風何爲至  
我方茲躋地志在回天敢圖副元帥之尊先畀小  
行人之問恭惟某官篤誠而明允剛直而枕恂無  
鳳笙龍管之豪華有麟趾兔罝之信厚文王之昭  
周人之祚固多千里之駒河間之略江夏之功罕  
露一斑之豹獨公慷慨同國戚休星紀一周未皇  
皇而莫枕風寒數颯屹在在之長城寸心如丹百

標二十

鍊愈白四郊多壘未容尋鷗鷺之閑二矛重弓且  
並揔貔貅之旅峴山旣捷泗水來歸不十日至長  
安會有官軍見威儀之喜用九泥封函谷無以賊  
虜遺君父之憂惟國爾忘家主爾忘身則男子當  
戰女子當運黃河以南行皆晉土自陝而東是在  
周公其愛莫助之遐不謂矣木牛流馬敢辭轉粟  
以上天挑蟲并蜂但願徹桑於未雨

代回廣西李經略說

代何月湖

小司寇之持平躡陞五雉大府帥之委重遠寄雙  
魚懷感有之真懷無所恭惟某官名高斗北惠滿  
天南槃槃都會之雄庶邦君之奔走英英文武之  
特一號令而精明公無遐心民可吐氣某斷輪旣  
老整履已晡宜人獨桂林遙想玉筵之碧忍渴望  
梅嶺願調金鉉之黃

代回廣西李經略說

荷囊輟直桂莞分符靴刀列郡之迎古稱大府襦

標二下

袴萬家之喜今在細侯仁氣南驅善聲東迤恭惟  
某官通材治劇厚德鎮浮財貨本末源流早振地  
官之職侍從論思獻納晚深天宸之知遽厭承明  
之廬歸拜散人之號時方多事公未可閑謀帥須  
賢起家甚寵若衛公之鎮撫九十六郡與龍表志之  
都督二十八年能安越人莫非李姓宜其苗裔復  
此蕃宣顧恐青羅碧玉之江山難駐黃閣紫樞之  
步武某龍鍾已久燕賀無由夔府竹枝之歌旣成  
昨夢漢節梅花之句願寄故人

代回廣西李經略說

价藩報政祕殿升班八桂不曰炎荒固號登僊之  
勝四松取之熱撰殆非寄祿之常帝綽漢孚帥符  
鼎重恭惟某官材全業鉅器博聲宏厭直承明之  
廬作牧始安之徼玉簪羅帶江山分一半之天金  
節油幢庭户行千里之地果臻帝爾進元宸奎河  
洛圖書之淵榮光上燭嶺海輦轂之治和氣旁行  
會見出綸又迎歸袞某無由旅賀猥辱搗謙誦大  
古而歌散人吾事濟矣去上天而辭宰相公自計  
之

梅亭先生四六標準卷之二十

梅亭先生四六標準卷之二十一

安撫 帥守附

賀衛參政除江西帥 經

九重圖任起東府之元勳十乘申咨撫南昌之故  
郡蔚懋棠之未翦紛騎竹以爭迎四履驩然重臨  
幸甚恭惟某官智仁且勇直大而方崑山片玉之  
挺生天寧無意虎丘一輪之未滿公亦何心然夷  
狄之間寇公與兒童之誦君實是關國體難久家  
居與我處畎畝之中只成歸潔使人得湖山之外  
盍尉去思宜煩熊旂犀節之嚴更借鶴嶺鴛峯之

重軍民雷動共欣吾父之重來道路風傳仍喜我  
公之未老凡自卯至酉之交談蓋先庚後甲之素  
孚善人七年流秋殺春生之惠長天一色洗星移  
物換之悲昔黃霸之於潁川及馬摠之於鄆鎮雖  
云再泣詎足並言蓋申命宅南之咨乃歸公于東  
之漸魁台齊色益足光牛斗之墟霖雨思賢會即  
騎尾箕而上某 一違材館四候觀臺造舟爲梁鬢  
已蓬於灑瀕荷戈與袂骨幾藁於褒斜難爭汗馬  
之功徑返屠羊之肆忽聞閣禮樂之有帥喜至捲  
詩書而欲狂偶見苦於小兒未得詣於大府下榻

而延孺子詎敢希舊物之收踵門而告文公惟當致新甞之敬

賀任樞密除福建帥希夷

元老得閑价藩出牧道古今而譽盛德既將相之兼資至將相而歸故鄉在古今而有幾通觀全德足立懦夫恭惟某官輔世真儒爽邦良弼春風沂水夙卑游夏之淵源界靈岷山更陋鄉雲之河漢早克勤於小物晚服在於大僚非仁義莫陳於前  
有謀猷乃順於外雖風霆不顯流形之迹然天地能知體國之心 兵數年拓地萬里疇若子采方

十一

當顛面以正槐民具爾瞻何遽剖符而分竹拂衣勇甚懷綬忻然問之往來皆云昔疾而今愈決於去就足窺衆醉而獨醒爲之兆兆足行莫而發發必中全閩鄉部秘殿政塗尋某丘童子之釣遊聽去時兒女之笳鼓所貴於天下士者動靜不失其光明豈不誠大丈夫哉進退一歸於禮義不負所學是在我公林下有人少伴越地禽魚之樂橘中未老尚見商山鴻鵠之飛某夙累公知敬爲國賀江空而歲年晚載歌百年幾見之詩水煩而鱗介勞更致列城一陶之請

代曹安撫賀衛參帥

江

疇咨舊弼出牧价藩泰階六符下照星沙之地元  
戎十乘大開天柱之雲前茅甫臨全楚臣豫恭惟  
某官洪深而肅括明允而篤誠魁下三台付榮進  
於素定胸中五色補造化而不言由兩地以養恬  
爲二天而出守辰猷定命聯漢殿以通班甲令著  
忠盡衡山而賜履玉麟訢合竹馬驩迎令湘安流  
使嶽修貢政平訟理而無愁嘆聊寬南顧之宵衣  
國小地狹不足回旋即後東歸之畫繡某濫揚前  
糝幸及戍瓜以望君如歲之心願言叱馭然用微  
霖之命猶恐追鋒

六標二十一

賀廣西管漕

湛

除靜江帥

代衛參帥作

寓班東觀宅牧南郊一道熟於馳驅不勤易地五  
筦資其節制何止觀風恭惟某官器諳浚明風猷  
凝邵自望郎而樸被進退可觀由膚使而褰帷光  
華益遠尋領將輸之寄益高澄按之功帝謀帥之  
惟難公撫封而少駐英英桂林之伯願懋膚功渺  
渺洞庭之波尚資餘潤其濫承嘉惠竊倚德鄰湘  
水安流正藉戈舟之重夜郎爲微敢忘銅柱之威

賀夔路徐安撫除瀘帥

瑄



西漢奏功東川徙鎮占一星之入蜀謂合遄歸不  
五月而渡瀘却疑深入賢勞何憚聖眷惟深恭惟  
某官胸湛明冰膽韜古劍意匠淡經營之表凡馬  
坐空才刃游肯綮之間全牛立解入朝萬爾乞郤  
翩然漢水爲池民無愁嘆巫山猶錦使有光華雲  
出無心且聊爾陽臺之下春行有脚又移之楚道  
之間若時江陽寶雉益部地望隆重視古元侯民  
俗恬熙爲今道院然天大地大自足着鵬鷗之游  
何月更歲更獨不出魚鳧之國殆欲紓憂於西顧  
即觀錫命以東歸某越在師行無由旅賀轅下甚

標二一

安於局促狹中敢累於提檠不進不休聞又綴鷄  
書之末載飢載渴但願從魚服之歸庶因青簾白  
舫之回一見紅旂碧油而去

賀徐漕除東路安撫瑄

升班延閣就鎮价藩耀東壁之圖書光于列宿控  
西陵之門戶專在三巴無改舍易轍之勞有弭節  
建牙之寵用賢如此通國驩然恭惟某官得天委  
和與月爭皎一時歐范共推無黨之雄文千載于  
張終愧有功之陰德甫更再轉亟取一麾化行江  
漢之未幾名震京師而難掩周爰咨度遠有光華

白帝城高符節久煩於兼領烏孫國亂藩籬有貴  
於預防就煩使指之膺專總帥連之重肆加內祕  
益壯中權不十日而至長安漸試魏延之策命一  
將以向宛洛將圖葛亮之功諒飽巖排峽東之詩  
合勒地闢天開之頌某絕無操挾獨辱知憐頃徒  
據地以承顏聞亦爲天而啓齒實不知師德之薦  
遂有缺君房之書諒姑充賦於公車豈欲收恩於  
私室待孛生者何道豈當求益於連成知徐公之  
有常定不昨取而今捨

通湖南安撫曾參政

從龍

任武岡倅作

標十一

望魁台之下以隔師門超翼軫之旁今依帥閭庸  
馳函於籤府嗣欵版於轅門恭惟某官氣擊扶搖  
曾藏磅礴學粹然而出正文卓爾以不羣榮進負  
素定之科温飽非平生之志蓋中興狀頭之盛三  
十有三自大節終身而觀幾年無幾獨凜凜梅溪  
之氣槩與英英無垢之風標民鮮舉之公其人也  
不然既登兩地之峻何至弗能一日之安春容東  
海之濱殫盡南陔之孝三年過隙謂當宣文德之  
麻十乘啓行顧使分武安之竹洞庭九州之大詎  
止价藩衡山千里而遙是爲岳牧暫借傳品之兩

略行湘水之春無回旋不足之疑見塊北無垠之大對半夜之間亟遄宣室之歸反九章之騷即報脩門之入惟公懋德相我受民其甘以迂愚老於廢棄誨諸生於館下以冗見治試別駕之治中無材可展然都梁之斗壘固全楚之井疆自昔非螭蠲之鄉詎容置倅比年更虺蜮之警浪轉爲丞茲載忻而載奔幸受容而受察門生不知恩非人也竊自怜柳子之窮相國求余文知我哉何敢學韓公之傲

通興元楊安撫

九鼎

任武岡倅

隨帥幙於西滇濫綴賓僚之末望將增於南鄭遙依節制之尊姓名難摸於暗中牋記盍馳於麾下伏念某嶽崎半世拓落一官口耳止數寸之間淺哉學問頭顱入四十之後荒矣功名亦欲守山澤之臞又恐俱草木之腐昨獻公車之牘謾投光範之書大鈞塊北而無垠曷嘗遐弃小技卷曲而不中自欲卷懷適會文翁留再剖之符復令王陽叱九折之馭沐浴而戒行李極知見笑於大方蹉跎而效小忠亦欲少酬於知已然之蚍蜉蟻子之援而落魚鳧蠹叢之邦繞樹凄然託根何所恭惟某

官肝膽一劍精神五兵攬轡登車湘水詠揚憑之  
德輕裘緩帶峴山留叔子之名既思鱸以歸吳忽  
乘輅而諭蜀天旋夔峽良費馳驅地重秦關徑煩  
彈壓况是四郊之多壘尤須千里以折衝遠其慮  
以圖非常之功積其力以俟可乘之際公固有志  
於世世寧無望於公惟無敵知儒者之真則可大  
皆賢人之業尚念其藐無操挾全蹈踈庸仰天漢  
之云高相國方追於國士思月湖之所與中郎或  
識其典刑

通湖南曹安撫

音約

截江而屹廬山仰高有日披雲而翻嶺嶽拜下可  
期藐然縣掾之抗塵眈此帥連之隸役事有稽於  
故實書足達其姓名敢以暗涼隲之耦儷恭惟某  
官風猷明後天韻崇訖自其不卑小官於州縣之  
時已知將降大任為社稷之器曩者恢復之役事  
有至難誰歟倉猝之謀談何容易維時漢廣孰是  
皇華能與城以俱存尊乃勇耳使自焚之弗戢燕  
可伐歟中冒鵝鶴魚麗之行旁絕虬蟬蟻子之援  
所忠者國遑恤乎他屹然孤壟遂作百川之障只  
此一事已堪千載之垂來自重湖徧持三節人不

疑其爲驟天亦慊於未臚鋒螭斧螭敢肆萌芽之  
怒帶牛佩犢忍違葱韭之安奏刀割然苞拊黜矣  
太守不有肯與許以爭功皇帝曰嘻盍召曹而入  
相復念鯨鯢之已戮得無鴻鴈之未安非高牙大  
纛之小留恐右粥左食之或闕仍能羆之總帥峻  
龍馬之負圖無以我公歸方恐須袞繡樂爲天下  
道也請被弦歌某拙不時宜窮自天賦粗識丹鉛  
之點勘安知朱墨之勾稽負米屢空爲親勉出繞  
枝自許非賢疇依然長沙不足回旋先生升矣縱  
短簿能令喜怒伊誰念之使得侍一日之間亦足  
尉平生之願湖南於人不輕接何恃而來冀北之  
野無留良實非所望

通安撫衛大參

四

書生漫仕抗塵縣掾之卑十史洵辰隸役帥連之  
下藐塵埃之簿領跂霄漢之階符斐然修辭甚矣  
犯分恭惟某官造道自得經德不回退然得聖人  
之清進則任天下之重外凌雲之未剪內偃月之  
方深去而違之十載孤舟之橫水時乎可矣一朝  
巨棟之擎天不負獨對衮衣之詩盡洗兩造吾門  
之請入參國論出庀祠宮卒以道而岳伸初何心

於止速在外則植旗旄羅弓矢公豈此榮其功之  
銘鼎彝被弦歌士誠有望不謂聽麻於文德轉而  
分竹於武安長沙千里之平古稱清絕洞庭九州  
之大新困繹騷茲勤二三執政之行殆非尋常謀  
帥之比自天有命固已興宣室之思惟帝念功寧  
久作南邦之式暫撫湘纍之蘭芷即歸商鼎之鹽  
梅民無不獲之夫公有無窮之聞某起家素賤受  
質朱愚學不前人空守嗜書之癖飢來驅我遂生  
竊祿之饒不虞小吏之凌兢正託大鈞之坎北造  
後造而廁下列嘗累一陶褻章服而揖上官惟當

三沐

通浙西袁安撫

韻

十年幕府負公事未了之癡千里王畿隸華使周  
爰之度聊步邯鄲之故欲瞻京兆之真輒修偶儷  
之詞薄叙畸孤之迹伏念某幸惟洛誦家本唐餘  
因應 而惰農遂去民而就吏昨貪近祿浪賦遠  
游歷并捫參再造魚鳧之國逾沔入渭兩經鳥鼠  
之邦偶爾得歸置之勿論茲操破釜來問大鈞辱  
令芻狗之陳更贄木牛之運幸頭見日良忻近咫  
尺之天滿腹飲河政不過斗升之水然非有萬間

之芘將若爲三匝之依伏遇某官器博而周材弘且毅無曲孝以阿世言言博士之風不錮人以收功挺挺司徒之列徧儀旣仕具載休聲惟長安諸夏之原視商邑四方之極宜得翁歸之公索仍兼廣漢之聰明弄印無以易堯持教使之告舜京師浩穰已迎刃肯綮之間侍從論思即聽履疑嚴之上尚念其不堪位置何足控搏效韓愈謹奉大丹之書非爲文也慕劉向獨序馮翊之傳尚有志焉

代回臨安趙帥

師石

拜命中宸參華外府彈壓輦轂旣知天邑之尊平

標三二一

準京師又借月卿之重少騰歌於張趙即接武於夔龍某方聽除書欲陳慶語不虞貶損猥賜鳴謙會見九遷之榮當不賀而足

代回夔路王安撫

宗孟

垂共工而服命躡視大常伯之班夔有國以建侯遠致故將軍之禮燁然尺牘展也千金恭惟某官殖孝端深禔身凝遠建武功臣之後文獻具存正元朝士之間德音孔碩由觀風而分閭不易地以開藩睠是陳人接扮榆於西泝憐其舊日拾橡粟於東屯雖糠粃不足於戴揚然草木實同於臭味

春風披拂楸樹馨香仍飛剪穀之文見籠斷輪之  
老其強顏曳履有味挂冠共飲玻璃江固已蒙九  
里之潤俱是蓬萊守願早乘兩腋之風

代回湖南曹安撫

彥約

陞華延閣作牧价藩長沙千里之平孰主張是元  
戎十乘之啓實寵綏之恭惟某官抱負寬疏踐敷  
詳熟崇詩書閱禮樂天稟有餘羅弓矢植旂旄人  
疑爲晚以扶輿磅礴之地有奪攘矯虔之風裒兇  
鞠頑未正鯨鯢之戮烜威赫德是資虎豹之韜願  
疇末乃取闢之功行有使果召參之寵某緬懷先  
契實托通家拙政在前乃不足乎揚之糠粃同年  
有後亦助旁而譟其鼓旗

代回夔州王帥

宗孟

肅將使節就易帥垣號令晶明初不勤於易地圖  
書清邃果何遠於去天恭惟某官昭代通材名門  
勝士從容官牒鴈所至而有聲剖決吏文牛雖全  
而自解茲乘漢傳出護蜀門八陣縱橫久督木牛  
之運三巴䟽鑿更分銅虎之符念糠粃之在前餘  
草木之同味竹枝嘔啞敢望播揚楸樹馨香滿期  
封植用仁侯之新政慰太守之舊民愛莫助之遐



不謂矣其無由旅賀猥沐謙搗指爪偶然終憶飛  
鴻之涖上頭顱如此更慙神虎之門中

代回襄陽劉安撫

光祖

陞華殿左轍鎮山南千里見王雖未究獻納論思  
之益十連爲帥亦可策還定安集之功邊面晏然  
上心簡在恭惟某官三代遺直一世偉人儒特立  
而獨行蓋以有益於國士任重而道遠不止獨善  
其身抗正論於經帷吐苦言於諫紙芳馨香矣流  
落久之屬時改弦令公趣駕方抱同朝之喜忽聞  
分鑰之殊休兵屯田政須元凱之規畫輕裘緩帶  
會繼叔子之功名無有遐心益觀遠業某曾同臭  
味頗共浮沉唱白銅鞮空羨接籬之倒吟青玉案  
不供繡段之酬

代回史安撫

彌堅

光膺芝檢進陟松班一札細書渙絲綸之溫潤十  
連大國添旗幟之晶明恭惟某官世濟壯猷家傳  
遠業輦轂之下彈壓夙著能聲侍從之間論思益  
高雋軌遽厭承明之夜直出爲湘水之曉行展長  
沙千里之平袴襦自得鎖洞庭九州之險舟楫無  
虞叢然獠蠻囂于鼠穴勝之不武雖多殺以奚爲

綏之斯來宜脅從而罔治帝嘉成績詔錫隆名東  
璧圖書姑暫煩於寓直南邦藩翰會趣用以遄歸  
某自媿望秋未遑賀夏徒以在前之糠粃荷不鄙  
夷其如莫報以瓊瑤止深感載

代回徐安撫

邦憲

陞華法從作尹神臯疇若予工有滢貳卿之命徒  
得若重底寧千里之畿澳號旣揚師虞允穆恭惟  
某官靖共而正直肅括而弘深中外久於踐揚上  
下孚其名實大宗正之盤礴公豈曰淹少常伯之  
超騰人不謂早當日畿之謀帥勤天陞之掄材特  
陞獻納之班俾任浩穰之寄欲粟賤追李峴少慰  
閭閻錄囚歸問不疑更光史冊某自聞先庚之令  
亟展同寅之恭材俊滿前欲譽盛德而不敢珠玉  
在側始媿先施之未能

代回潼川劉閣學

甲

出綸北闕賜履東川臣作股肱宜職五言之納王  
之喉舌游勤四國之蕃西顧旣寬南圖益大恭惟  
某官清標拔俗厚德鎮浮二十四郡之無人已見  
真卿之節一千餘家之失火何勤長孺之行然使  
玉帳之輕孰借銅官之重元戎小隊聊復班石谷

戎之號令白鹽赤甲壯全蜀之藩垣不俟突黔即  
應詔紫某守邊弗績受代得歸已問檣烏頓有身  
輕之喜尚陪厦燕獲伸面賀之誠

代回畢安撫

冉遇

疇庸邊閫進秩內徽宣化承流將視儀於三事定  
功保大仍作鎮於十連成渙載揚在師允吉恭惟  
某官果毅而有守沉鷲而善謀心潛濟北之一編  
材駕山西之諸將屬當敵警屢挫虜鋒鶴唳風聲  
走符堅於淝水鵝鳴雪夜擒元濟於蔡城公將策  
大漠之功上已棄單于之過戢干戈橐弓矢既放

西平九一

廿

桃林之牛安邊境立功名真跨揚州之鶴鼎來恩  
綽晉錫師麾英節麟符勉徇借留之請神旗豹尾  
佇聞入衛之榮某拘以綴班闕於馳慶十部從事  
慚無瓊玖之酬千里折衝願體冕旒之眷

代衛大參

四

回沈安撫

作賓

煥被宸綸屈臨藩服都督居翼軫之分龍光近映  
於越壇尚書象台斗之躔符采正聯於奎閣所欣  
晚歲及話平生恭惟某官望實夙孚人門具美氣  
深且厚會三光五嶽之全才碩以疏了四海九州  
之大小自徧儀於省寺尋屢課於節麾值北風之方

之春方國細書恐趣侍雲臺之下某久燕居息復  
鳩儔功憑飛廉以寄聲若爲厚報望崦嵫而勿迫  
猶佇遄歸

代回揚州崔安撫

與之

建纛偃藩方欲馳於慶牘濫巾分間何遽辱於朋  
緘一謙之光三復以愧恭惟某官氣涵天粹材應  
時需德性得南方之強文字喧西都之價仁勇充  
然於六館獨何蕃歟言行考之而一人如清河者  
羣飛方銳勇退尤高甫躋郎舍之華即領帥垣之  
寄堰橫古埭尚如召伯之棠地對長江曾擊祖生  
之楫惟良刺史尚友古人使功名配於前聞則富  
貴乃其餘事某何功湘楚又守勾吳捲兩西山良  
有愧關公之望觀梅東閣恨莫窺何遜之詩

代董侍郎回夔路丁安撫

黼

疇庸靈石改牧夔藩畫舫青簾昔固識灑瀨之馬  
碧油紅旆今重認常山之蛇建牙云初滿日交慶  
恭惟某官風華俊茂天韻崇茲正色立朝有嘉猷  
則告于后抗章請外取膏澤而下諸民廣信之政  
旣成承明之召宜亟適茲魚復重在麟符出幕十  
年去思未遠賜書一札易鎮攸宜廬矣彤弓新元

驚往驚壽玉壘嗟白日之可鑿忍附冰山天必諒其  
肺肝帝用居之喉舌比解樂樂之鞞載揚子子之  
旃賦政未幾已被五袴之燠策勲如許爰加六纛  
之崇瞻西序之凝嚴覺南州之雄重自文昌臺而  
爲帥長已符益部之前規由節度府以拜僕臣好  
追陳許之舊事某悵故侯之老矣除新尹以慨然  
蚤共參謀之遊兩皆清齒後見諫議之面獨在素  
書爲留襟帶之區以續素簪之舊某丘某水儻遂  
菟裘之歸我笱我梁尚託緋袍之誼

代回洪廣帥

後

西六十一

升班東觀宅牧南郊四牡載驅和氣久騰於大庾  
五羊夾道懽聲迎見於細侯恭惟某官器誥端方  
風猷凝遠力欲磨礪乎事業肯甘塵土之功名天  
上九虎閑獨掉頭而不顧人生五馬貴四出守以  
無嫌果從乘輅竟遂分閫旂幢蓋海官廉知蚌蛤  
之回葺燾饗軍食足驗羽鱗之飫自古常重於他  
鎮惟公克對於前人使扶胥黃木之灣民無遺便  
則甘泉紫荷之橐王曰遄歸某濫長十連實隣五  
筦亟問亟餽良勤吾味之同旣足旣濡尚幸君波  
之及

代回成都黃安撫

疇若

長沙地濕漸謀下澤之乘蜀道天高猶切上流之  
潤欲修辭而臯緩媿垂問之諄勤恭惟某官忠結  
兩宮名高九牧厭承明勞侍從暫違豹尾之班望  
太白橫岷峨還作鰲頭之望三年而化兩社方虛  
正元朝士之無多今召君矣潁川太守之第一世  
有人哉某息影投林起家分閫秋毫皆出於帝力  
未有報酬夏畦不習於諂肩誰其全度欲動鱸魚  
之興莫瞻龜鶴之還

回諸郡賀權安撫

攬轡登車久慙一節代庖越俎暫攝伍符迫便旨  
以強顏申牢辭而俟命有勤嘉勞更重愧情伏惟  
某官廉平帥先中和宣布平生無襦今五袴民則  
幸哉屢薦入朝乃一麾公爲淹矣有怜諭蜀老之  
檄安用假齊王之封和衷已藉於同寅遣使若爲  
而旁午三夏元侯之享固使臣不敢與聞五物衆  
庶之詢以夫家辨其可任豈謂京兆之五日亦蒙  
郇國之朶雲某正爾循墻期於弛擔籍吏民封府  
庫以待將軍顧草木望林巒請回俗士  
梅亭先生四六標準卷之二十一

梅亭先生四六標準卷之二十二

總領

賀牛都大除總領

六年

知榮州作

結知宸宸改領餉臺千里餽糧有飢孰堪將拍六  
計以廉爲本疇可易公成命風馳驩聲雷動恭惟  
某官弘深而肅括忠肅而篤誠爲淮海維揚之後  
人得伊洛入河之宗派仁爲己任此心即禹稷之  
心謹厥身修所學皆孔周之學安行塗轍動中和  
鑾名旣震于京師才合居於給諫行行且止避御  
史已播流聞皇皇者華遣使臣乃頌咨度茗駿之

登旣羨槐龍之對可占留蕭相於關中且專餉事  
任武侯於渭上式敏戎公然劔閣雖曰崢嶸而崔  
嵬而益州實覺疲敝之危急舐糠何止於及米放  
手寧恤於傷葵人知罪歲之徒然天遣福星之臨  
止序諸侯之上暫借重於王人折千里之衝即遄  
歸於政地恭比緣井改益覺困窮雖飲冰食蘗以  
自將然求牧與芻之未獲置郵傳命喜聞君子之  
得輿升斗疏恩庶免波臣之涸轍其爲忻懌罔旣  
敷宣

賀黃蓮使除總領

申

內躋郎省外總餉臺西賓出幕之十年遂專主席  
東漕下車之三月盡總賦輿人歆錫命之蕃上恨  
用公之晚恭惟某官器資凝遠業履端溫言行夙  
擇乎中庸名實久孚於上下頃歲紅巾之變折衝  
白刃之間數進忠規刈葵惟恐其放手縱無恩澤  
徙薪豈下於焦頭共推江夏之無雙再試潁川之  
第一維駒維騏維駱暫紆苞栩之飛如熊如羆如  
貔孰飽樵蘇之饜帝咨衆望僉曰公宜王人下視  
於諸侯有嚴天節郎官上應於列宿肯歷土山政  
令先庚而已孚軍民勞午以相賀田里愁恨嘆息

標三

久已周知財貨本末源流尤皆宿講皮不存則毛  
將安傳唇既亡則齒得無寒欲兵食兼足之沛然  
在制閩同心而已爾既無間越秦之肥瘠何難圖  
韓范之功名某百無一能億或屢中頃進總領甚  
稱之語蓋在咨諏周爰之初茲聆除目之頒豈勝  
頓足之喜惟榮之歲租無五千斛而使所月解近  
七萬緡昨賴管前煎抱賣之贏用補大科帶補之欠  
近困井遷之後難施箕歛之苛在小郡官兵既多  
空腸而大司符移尚理虛額巧但施於有麪窮莫  
甚於無錐與物爲春望公如歲今夕飲者恩明日



按者法正累故人觀察急於賦刺史私於民願哀  
老子

賀楊總領九鼎

升賢九列總賦兩川無踰老臣久望甲寅之報  
厥有成命足寬庚癸之憂除目一傳滿口交慶恭惟  
某官資弘且毅器博而周解十二牛而有餘才固  
高於一卅繫千駟馬而弗視氣亦蓋於諸公天使  
之爲入蜀之星人以此卜擒胡之月知彼知己漢  
中方務於養民擒賊擒王許下幾爲之避地徒緣  
食乏遂致師還皇欲我公身任此事爰峻上卿之  
拜俾專計相之權金掌月升光無不燭玉關夜閉  
守或有餘聊寬西顧之憂即聽東歸之命某聳聞  
出綉竊喜得輿敢問遲之遲長恐遭羣吠之恠可  
以速則速幸即遄四牡之驅

通四川王總領鉉代董制帥

企郎宿之周天夙瞻景耀望使星於蜀野行挹餘  
光同是天涯莫非王事欲捺方寸之烟可無咫尺  
之書恭惟某官器度崇宏典刑炳蔚江左風流之  
後代不乏人襄陽耆舊之家世濟其美恬於再轉  
翩若一麾日近長安謂即登於金馬天通蜀道又

出護於木牛惟關中餽餉之功實海內安危之本  
推蘇後爨今多宿飽之師弩矢前驅古有晝行之  
羨行詠勞還之四牡佇觀趣侍於六飛某起家單  
平蒙恩優渥立朝已濫泥塵六典之卿試郡猶慙  
輒冒十連之帥躊躇四顧冒昧一來惟方國奉十  
行之書妄希宣布諒王人序諸侯之上亦願將明

代回趙總領

不憚

餉師天塹晉秩月卿峙乃糗糧坐給列屯之衆厲  
以爵祿宜登九州之命恭惟某官育德忱恂揆材  
膚敏方公私之積可哀痛孰與阜通顧財貨之出  
有源流當加斟酌暮年而變千里無飢載疇流馬  
之功宜進執羔之寵某阻陪賀旅先辱搗謙卿不  
同乎已升華於元冕公歸無所會加畀於繡裳

代董帥回揚總領交割

榮駕駟車遄開犀印卿士惟月班通河海之間軍  
聲如雷驩溢關山之外恭惟某官材弘且毅器博  
而周運斤成風解全牛於四顧策轡奔電洗凡馬  
而一空皇咨分閩之勲命亞執珪之位合東西而  
瞻使節共稱總賦之有人分南北而立王庭何患  
擒胡之無日亟觀舍爵佇即歸班某有幸為寮又

將徼福百里九十正倚同舟共濟之功一日三秋  
願叱負弩前驅之效

代回趙總領不壞

祥刑訓夏深愧曠官事典司冬猥令率屬冒恩有  
覲竊比知歸恭惟某官給餽上流簡知中宸樵蘇  
宿飽知調度之賢勞袞繡書行佇詔書之趣覲有  
華餘潤且及陳人某度其夕陽宜於野服猶曳鄭  
崇之履小立斯湏行巾元亮之車又奚惆悵

代回四川陳總領咸

陞御九農給餉四蜀事權增重光弩矢之前驅氣

標

色益明飽樵蘇之後爨恭惟某官學宗洙泗秀稟  
岷峨介然忠勤屹立江流之砥見於調度傍流地  
上之錢致詳慮於講解之餘定經制於裁節之內  
粟塞其庾已成末乃取闢之功印弄於庭宜有無  
以易堯之命庸進執羔之寵以彰流馬之勞正觀  
游刃之若新何慮強弩之已末某儻功竭日得謝  
爲期取御史於九卿之中行觀更迭序王人於諸  
侯之上願立斯湏

代回湖廣趙總領彥楸

疇庸外府進位上卿禮樂光華旣茂明於調度貨

財平準茲益重於事權除目一盼輿言胥穆恭惟  
某官持心信厚臨事浚明恭懿篤誠繼高陽之六  
子切磋磨琢蹈衛國之武公揚歷彌深聲華甚茂  
茲肅將於使指俾總視於軍儲曾不淹時已聞奏  
最爰進四大夫之祿仍斡半天下之贏是亦平遷  
行有峻擢某未繇旅賀例辱巽戕卿不同乎已陞  
華於元冕公歸無所會加寵於繡裳

代回湖北錢總領

文子

自違貝闕寢遠珠庭迹雖遠於行藏心實馳於賢  
德恭惟某官材全而業鉅學廣而聞多鞭霆駕風

標二

已上蓬萊之島捫參歷井遽登蜀道之天飛芻遍  
給於列屯叱馭不辭於九折成功者去盍歸乎來  
惟是洞庭彭蠡之間實接夜郎牂牁之徼少湏澄  
按庶免繹騷當飢饉師旅之餘民亦勞止在諮諏  
詢度之事公優爲之顧恐詔溫不容席煖某腰黃  
無補頭白思歸嬉笑文章良感雙魚之遺光華禮  
樂願遄四牡之驅遷召新榮眷委庸敬不敢煩瀆  
併幸照知

代回淮西趙總領

不憊

陞卿九苞給餽列屯人自日邊恩榮畫錦之遣錢

流地上師有宿飽之期下車云勿載路相慶恭惟  
某官直温而肅括明敏而䟽通早練達於民庸洞  
講明於邦計懋轉輸之績飛不盡翰持經濟之材  
翔而後集屬邊防之小定惟糧道之孔艱爰興前  
席之思久不見賈復念弄印而授無以易堯庸䟽  
執羔之榮俾專流馬之運序王人於諸侯之上姑  
驅馳數月之間求宰相於宗室之中會凌厲九人  
之後某託交惟舊話別方新闖伺眡龜正欲致燕  
雀之賀勤渠專騎乃先辱鯉魚之書徒華巾笥之  
藏莫遂襜褕之報

梅亭先生四六標準卷之二十二







